

Date – 07/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Dampa Bial By Election campaign chuan a vawrtawp a thleng chho tan a, Political party ten theihtawp chhuahin vote an zawng mek .
2. MNF Legal Board chuan Chief Minister chu campaign-naah hnam leh hnam inkara inhuatna thlen thei thu a sawi bakah model code of conduct a bawhchhia ni a sawiin CEO hnenah an zualko.
3. Bihar Assembly inthlan thawhkhatnaah vote zaa 64.46 a tla.
4. Prime Minister Narendra Modia chuan vawiin hian National Song "Vande Mataram' kum 150 tlin lawmna hun New Delhi ah a hawng dawn.

<><><>

DAMPA CAMPAIGN

Dampa Bial By Election campaign chuan a vawrtawp a thleng chho tan a, Political party ten theihtawp chhuahin vote an zawng mek a ni.

Dampa bial By-Election atana campaign Minister Pu Lalthansanga chuan nimin khan Dampa bial, Parvatui khua a tlawh a, thusawiin kuthnathawktuten taima taka an thawh mil a tanpuina pek leh khaichhuah chu ZPM sawrkar tum ber a ni a ti.

Kalphung tharah chuan dik taka hnalak te, thalai lekhathiam ten party bik induhsakna tel lova hna an thiamna phu tawk mila an hmuh theih nan te, Mizorama rorel tawh party dangten a thlawna pawisa sem ngawt an chin te tih ve loh an intiam avangin an sawrkar a, tun thlengin chutiang chuan ZPM sawrkar chu a la kal zel a ti a, an party candidate Pu Vanlalsailova chuan neihsumah chhuan tur nei lo mahse Pathian tanpuina hmanga a tlin ngei a rin thu a sawi.

BJP Mizoram State President Dr. K. Beichhua, MLA chuan Ailawng khua a BJP Party mite a kawm a, thusawiin Central Project-te chu state sorkar kaltlanga theh thlak ngai ni mahse a bawhzui a nawr hlawhtling tur erawh chuan Mizoram BJP an pawimawh a ti.

Central-a an hotute chuan Mizorama BJP member te thu leh hla an ngaih pawimawhzia leh an hnena mamawh an dil leh an thlen te an ngaih pawimawhsak thin zia hretute chu Mizoram mipui an ni a ti a. Mahni fate aia mi dang fate duhsak zawk tumah an awm ngai lova, chuvangin Central Project-te chu state kaltlanga an theh thlak a ngai a, a bawhzui a nawr hlawhtling tur erawh chuan Mizoram BJP te an pawimawh ve ngei ang a ti.

State hotute chuan Mizoram mipui hriatah changtupa nih tum avanga thudik ziktluak lo sawi chu ching tawh lo se a duh thu a sawi a. Union Minister-ten an tiam angin, Dampa bial By-Election an hmachhawn mekah BJP-in sorkarna an chang a

nih chuan Dampa bialah hmasawnna an beisei te a takin an hmu ngei dawn tih a sawi bawk a ni.

West Phaileng Dinthar kawn a Public Meeting a neihnaah MPCC President Pu Lal Thanzara chuan kum 2028 ah Congress an sawrkar chuan thingtlang leh khawpui a mi harsa te tan eizawnna bul an tan na turin NLUP an kalpui leh dawn tih a sawi. Dampa bial bye election lo awm tur atana tun by-election ah Pu John Rotluangliana an thlang tling a nih chuan kum 2028 ah Congress an sawrkar ngei a rin thu sawiin, Congress an sawrkar chuan thingtlang leh khawpui a mi harsa te tan eizawnna bul an tan na turin NLUP an kalpui leh dawn a ti.

Tunhnaiah BJP kaihhruai sawrkar laipui chuan Mizoram Presbyterian Synod chu income tax a thing a, Synod hotute pawh Centralah income tax lam hotute dawrin an buai hle tih sawiin, hetiang thil hi Congress kum 60 sawrkar chhungin a thleng ngai lo a ti a, Dampa bial mipuite chu Congress Candidate Pu John Rotluangliana vote turin a ngen a ni.

<><><>

MNF LEGAL BOARD

Chief Minister Pu Lalduhoma’n Silsury khuaa Dampa bial by election atana a campaign-naah hnam leh hnam inkara inhuatna thlen thei thu a sawi bakah model code of conduct a bawhchhia ni a sawiin nimin khan MNF Legal Board chu CEO hnenah an zualko.

Aizawl Press Club ah thuthar thehdarhtute an kawmnaah MNF Legal Board Member, Pu Saihmingliana Sailo chuan tun thla November ni 1-a Chief Minister Pu Lalduhoma’n ZPM Party tana Silsury khuaa a campaign-naah MCC leh Dan dinglaite nasa takin a bawhchhia tih sawiin, Chief Minister chuan Mizoram hruaitu hmasaten Mizo mipuite leh Chakma inkarah inhuatna chi an lo tuh a, hruaitu hmasaten Chakma huat dan min lo zirtir tawh thin a ni tih a sawi a, hei bakah hian hemi ni vek hian Chief Minister chuan mipuite chu an party candidate an vote loh chuan sorkar atanga hamthatna an hmuh tur hrekah a vau bawk a ti a, hamthatna chi hrang hrangte tiamin Silsury kawng siamna tur cheng vbc 100 leh nuai 40 dah fel a nih tawh thu leh kawng tha siamsak an nih tur thu bakah, kawngpui, Border Trade, Chief Minister’s Special Package, mirethei in sak tanpuina leh an mamawh dangte pek an ni dawn a ti niin a sawi sawi bawk a ni.

Heng a thu sawite hian Election Commission of India in a duan, Model Code of Conduct chiang takin a kalh a ni an ti a, MNF Legal Board chuan CEO hnenah hmala tura ngenna an thehlut tih an sawi a ni.

<><><>

KOLASIB MURDER

Kolasib District chhung Dumkhel zau bula thlama riak Myanmar mi ni a hriat mi 2 inhnial buaiin pakhat zawkin chemin a sat hlum.

Lahlimpaia (54 vel) Pandaw, Myanmar a cheng ni a in chhal chuan a hnathawpui leh thlama a riahpui Tinchiauva (58) Mangkheng, Myanmar a cheng ni a hriat chu chempui in a nghawng, a Awm, a lu leh a ban veilam ah a sat a, Tinchiauva hi a hmun ah a thi a, a ruang hi Bairabi Police ten la in, a tul ang apiang an buaipui hnu ah nimin tlai khan Bairabi PHC ah postmortem anih hnu in, a chhungten ruang hi an khaw lam an panpui nghal ani .

Thil thlenna hmun hi Kolasib District chhung Dumkhel zau atanga KM 2 vel a hla, Lei dawh mek na bula mi huan thlam ah niin, an pahnih hian he Huan hi an enkawl dun a, thlam ah hian hun engemawchen an riak dun tawh ni a hriat ani. Dumkhel zau hi Hortoki VC huam chhunga awm niin, Hortoki atangin KM 12 vela hla a awm niin, Bairabi Police Station chhunga awm ani.

Lalhlimpuia hian a thianpa a thah hnu hian an riahna piah deuha mi thlam a pan nghal a, hetah hian Tinchiauva a thah thu sawiin, tlanbo lo in thil thlenna hmun Police an thlen thlengin alo awm niin thudawna chuan Kolasib a Akasvani corr a hrilh.

Tualthattu a puh Lalhlimpuia hi Bairabi Police ten man in, tualthah thubuai an siam sak a, he thu buatsaih lai thleng hian thu zawhfiah atan Bairabi Police Station ah an kawl ani.

An thian dun hian Zu an ruih avanga in hnial buai in, hetiang thil duhawmlo hi a thleng ta ni a rin ani.

<><><>

PRASHASAN GAON KI ORE

Lunglei District Deputy Commissioner Office bul tuma mipuite'n sawrkar hma lakna hrang hrangte an chhawr tangkai theih nan an khuaa kal chilha service hrang hrang chhawp chhuahsakna, "I Kawtkaiah Sawrkar" (Prashasan Gaon Ki Ore) thawh hnihna chu ni thawhlejni khan Bunghmun leh a chhehvel khaw mipuite tan Bunghmun BDO Office Complex-ah buatsaih a ni.

Bunghmuna I Kawtkaiah Sawrkar hun buatsaihah hian office hrang hrang - Deputy Commissioner, Election, BDO Bunghmun, Agriculture, AH & Veterinary, Health & Family Welfare leh department/office hrang hrangte'n stall hawngin, awlsam zawka mipuite dawr theih turin an inpho chhuak a. Aadhaar siam that/siam thar, Voter ID siam that, income/tribal/residential certificate pek chhuah, sawrkar scheme hrang hranga inziah luh, mihring leh ran hriselna dinhmun endikna, mipui hriat tur pawimawh inzirtirna leh mipuiin harsatna an thlenna hun te buatsaih a ni a. He'ng service hrang hrang chhawp chhuahte hi mi 453-in an chhawr tangkai a ni.

<><><>

LUNGLEI SMILE

Lunglei District Bawrhsap Pi Navneet Mann hovin Lunglei District chhunga sawrkar laipui Ministry of Social Justice & Empowerment hnuaia kutdawhte dinhmun siam thatna tur ruahmanna, "SMILE - Support for Marginalised Individuals for Livelihood and Enterprise" kalpui dan tur sawi ho a ni.

Bawrhsap Pi Navneet Mann chuan SMILE chu vantlang zinga dinhmun chhe zawk-te'n nun khaw chhuahna leh eizawna tha an neih theih nana an dinhmun siam thatna tura sawrkar laipui ruahmanna a nih thu sawiin, he hma lakna hi Lunglei khawpui chhungah pawh kalpui tur a nih thu a sawi a. Scheme kalpui dan tur ruahmanna tlangpui sawi fiahin, Lunglei khawpui chhungah he scheme hi

hlawhtling taka kalpui a nih theih nana rawtna hrang hrang leh hma lak dan turte sawi ho zui a ni.

SMILE kal tlanga hma lakna turah hian Lunglei khawpui chhunga kutdawh awm zat zir chian (survey) hmasak tur niin, kutdawhte dinhmun leh nihphung (profile) chhinchhiahna atangin ID Card siamsak an ni ang a. Kutdawh ngai lova eizawna leh mahni intun nunna an neih theih nan thiam thil zirtirna leh kaihhruaina bakah, a tul anga hma lakpui chhunzawmna tur te he scheme hnuaiah hian ruahman a ni bawk ang.

Lunglei khawpui chhunga hma lakna bul tan nan veng pali - Bazarveng, Chanmari, Electric Veng leh Venglaiah te zir chianna kalpui hmasak ni se tih niin, survey team pali din phawt a ni dawn a. Zir chianna hi January ni 15, 2026 hmaa zawh fel hman tura ruahman niin, zir chianna dinhmun azirin hma lak zel dan tur chu ruahman zui a ni ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BIHAR ELECTION

Bihar Assembly inthlan thawhkhatna chu nimin khan tluang taka neih a ni a. Inthlan thawhkhatnaah hian vote zaa 64.46 a tla a.Zing dar 7 atang khan Bihar assembly inthlan thawh khatna atan hian vote thlak tan a ni a, district 18 huamchhunga assembly bial 121-ah mipuiin an aiawh tur thlangin vote an thlak a ni.

Thawh khatnaah hian candidate 1314 awmin vote nei mi vbch 3 leh nuai 75 an awm a, candidate zingah hian hmeichhia 122 bakah mipa atanga hmeichhiaa inlet, transgender 1, Priti Kinnar-i te an tel a ni. Candidate langsar zual zingah JD(U) President leh Chief Minister nilai Nitish Kumar, BJP leader leh Deputy Chief Minister candidate Samrat Chaudhary, BJP leader leh Union Minister of State for Home Affairs Nityanand Rai, Lok Janshakti Party (Ram Vilas) Chief Chirag Paswan, leh VIP hotu leh Mahagathbandhan-in Deputy Chief Minister tura ruat Mukesh Sahani te an tel a.

Tangrual pawl NDA atangin JD(U)-in seat 57 an chuh a, BJP-in seat 48, LJP (Ram Vilas)-in seat 14, Rashtriya Lok Morcha-in seat 2 an chuh a ni. Eptu party tangrual pawl, Mahagath Bandhan atangin RJD-in seat 73 an chuh a, Cong-in seat 24, CPI(ML)-in bial 14 an chuh bawk a, party thar, Jan Suraj Party-in candidate 119 an nei bawk a ni.

Hetihlai hian inthlan thawhnhnihna atana campaign ngawrh taka neih chhoh mek a ni a. NDA leh Mahagathbandhan te chuan hmun hrang hrangah vantlang inkhawm an nei a. Senior BJP leader leh Prime Minister Narendra Modia chuan nimin khan Bhagalpur leh Araria ah hun a hmang a. Congress hruaitu Rahul Gandhi pawhin Araria leh Purnea ah a campaign bawk a ni.

<><><>

PM

Prime Minister Narendra Modia chuan vawiin hian National Song "Vande Mataram' kum 150 tlin lawmna hun New Delhi ah a hawng dawn a. He ni puala Commemorative Stamp leh pawisa thir a tlangzarh bawk ang.

<><><>